

Udin al fâs fieste pal so "complean": 802 agns di storie e identitât

Ai 13 di Setembar l'inovâl dal at fondatîf. La citât e torne a vivi lis sôs origjins

Ai **13 di Setembar dal 1223**, jenfri des muris dal Cjistiell e de Vile di Udin (ven a stâi jenfri des muris dal cjistiell e dal fossalat), il **patriarcje di Aquilee Bertolt di Andechs al implantà il marcjât che al varès dât vite al prin nucli urban de citât di Udin: capitâl dal Friûl storic**. Passâts 802 agns di chel at fondatîf, cheste ricorence e ven moreade e celebrade in graciis de iniziative dal **Circul Universitari Furlan "Academie dal Friûl"** e dal **Moviment Civic Culturâl Alpin-Adriatic "Fogolâr Civic" vuidâts dal prof. Alberto Travain**, cu la **poie de ARLeF - Agenzie regionâl pe lenghe furlane**. In ocasion dal "complean", ai 13 di Setembar cu ven, il Circul al dediche in maniere ideâl ai furlans - e no dome - un piçul riclam a chest inovâl ancje in gracie de distribuzion di depliants sul teme, metûts adun de Agenzie cu la colaborazion dal Fogolâr Civic, e che a saran a disposizion in ocasion des celebrazions in program.

Chê dai 13 di Setembar no je dome **une date storiche** che puartà ae nassite di Udin tant che citât-marcjât, cuntun guvier autonom e cuntun rûl centrâl tal Friûl patriarcjâl, *«ma un moment clâf pe identitât di dut un popul e di un spazi di civiltât ae crosere de Europe»*, al à ricuardât il president de ARLeF, Eros Cislino. Udin al fo il Comun citadin plui potent e inventîf intune Patrie dal Friûl feudâl, frontiere malcuete di civiltâts, formis di guvier e istancis sociâls. Une vicende apassionante che dal sigûr in chei 13 di Setembar e à vût une volte significative, sigurant ai furlans, tal ben e tal mâl, un riferiment gnûf e ancje disinvolt dentri de lôr storie, ancje cun stagjons promiedis di democrazie e partecipazion che a fevelin ancje al dì di vuê.

Dal 2001 indenant, il "Complean de Citât" al è celebrât ogni an tant che manifestazion popolâr spontanee. La celebrazion dal "Complean de Citât" e je un rituâl laic e popolâr che e torne a meti in lûs ancje simbui evocatîfs come la "scaçule" par clamâ dongje i citadins e il cûr cun imprimude la steme de citât. E je une ricorinche che e cjate lis sôs lidris tal popul furlan. Di fat la iniziative e je partide di une piçule clape di citadins apassionâts che a àn rivât a clamâ dongje man man dute la comunitât udinese, metint adun un **calendari di appuntamenti che ancje chest an a saran proponûts propit ai 13 di Setembar, scomençant des 9.30, cun partence de place XX di Setembar**. Tal 2005, cun di plui, il Comun al à alçât pe prime volte la bandiere civiche sul Cjistiell in ocasion de ricorinche, une presince aromai permanente. *«Tornin ae lidris, alore, e a chel sium che al è dentri ogni scomençâ. Co e nas une citât, ve che une gnove sperance di umanitât si impie te Storie.*

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<

Siums e progjets antîcs afidâts a popul e istituzions», al à ricuardât il professôr Alberto Travain, fevelant de iniziative.

Udin, ai 11 di Setembar dal 2025

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / **e-mail: arlef@caltpr.it**

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<